

Vahcuengh Raeuz

□ Vangz Haijyen / 黄海燕

Gou dwg vunz Bouxcuengh, caeuq sojmiz Bouxcuengh doxdoengz, rox gangj Vahcuengh dwg gienh saeh bingzciengz ndeu. Gou lij iq, gwn-daenj youq ndaw bya, rox gangj coenz vah daih'it couh dwg Vahcuengh. Gou lij caengz bae hagdangz doegsaw gaxgonq geij bi, baeznaengz guhcaemz guh'angq cungj dwg gangj Vahcuengh.

Gou ndaej caet bi lo, aemq aen daehsaw bae hagdangz doegsaw, cij rox lajbiengz lij miz vah wng dem. Lauxsae son gou doeg Sawgun, caemhcai q aeu Vahcuengh son gou gij cihmoq roxnaeuz coenz vah dwg maz eiqsei. Gou lij sing hung cam boux Veiz lauxsae: " 'Niux bohboh' hoiz baenz Vahcuengh dwg 'cwz-bohlungz' lwi? " Gyoengq nyez ndaw ban couh riuswdsd hwnjdaeu.

Youq lajmbanj doeg siujyoz bizyez le, gou bae cunghyoz ndaw cin doegsaw, miz doengzhag gwnz haw ndaw cin bingzciengz gangj Vahgun, gou boux ndaw bya ndaw lueg okdaeu, couh dap mbouj hwnj de saek coenz. De riu naeuz: "Mwngz baihgwnz baihlaj ngongz lailai, Vahgun hix mbouj rox gangj saek coenz." Gou mbat daih'it roxnyinh cij rox gangj Vahcuengh gingqyienz deng vunz riu.

Daengzlaeng, gou bae Bahmaj aen hagdangz minzczu swhfan doegsaw. Youq gizde, sojmiz hagseng doeg liux sei q bi bizyez, cungj ndaej faen bae guh lauxsae. Ndigah, gou hag rox ciengq go, diuq foux, sij cih, vehveh daengj gak cungj gak yiengh caizmaeg. Aenvih ngoenzlaeng aeu guh lauxsae, gyoengq hagseng dou, itdingh aeu hag ndei Sawgun gangj ndei Vahbujdungh. Cei q hawj gou angqyangz couh dwg dou lij ndaej hag Sawcuengh. Sawcuengh dwg gij sawcih Bouxcuengh raeuz. Cai q mbouj miz bouxlawz riu gou gangj Vahcuengh lo!

Couhcinj rox gangj Vahcuengh hix mbouj suenq lai maz bonjsaeh, rox yungh Sawcuengh daeu sij saek

duenh vah roxnaeuz sij saek bien faenzieng ngamq suenq maenh'ak. Hoeng gou seizde hag mbouj daengz giz, aeu Sawcuengh sij mbouj ok coenz vah ndeu. Seizhaenx, Cinz Siengzcouh lauxsae son dou hag Sawcuengh. Rox gangj Vahcuengh hawj gou hag Sawcuengh gig vai q, beij gyoengq doengz-hag cij rox Vahgun, cei qnoix doeg Sawcuengh mbouj baenzneix gazgaz gadgad. Cinz lauxsae seizde dwg bouxcoz loeklik ndeu, youq gwnz dangz cawzliux son dou hag Sawcuengh, hix son dou eu fwen, ndaw dangz hei qfaenh angqvumvum. Geijcib bi gvaqbae, gij fwen Cinz lauxsae son dou de, lij lumj ngoenz-gonq ngamqngamq son nei, seizneix gou lij ndaejgeiq:

"Yawjraen dahnuengx byaij gvaq daeu,

Mbouj sang mbouj daemq boux vunzndei;

Song da ronghruemj lumj ndaundeiq,

Ngangx gyauej rongh ndaej gouj diuz gai.

....."

Baenzneix vaiqlangh hwnjdangz, gyoengqdou gig gyaenz hag. Seizde, ndaw hagdangz miz mbawsiengq geij boux dahsau gyaunde i ndaej guh aen fungmienh 《Sam Nyied Sam》, gou gig dahoengz gyoengqde, youh gag ngauz gyauej gangj gij yienghceij bonjfaenh neix aeu mbouj ndaej dahraix. Yienznaeuz seizde gou ndaej hag Sawcuengh song bi gvaq, hoeng doeklaeng bizyez gou faenboiq daengz lajmbanj dang lauxsae, doeklaeng diuh daengz hagdangz ndaw singz, hoeng song aen hagdangz neix mbouj son hagseng Sawcuengh. Gou hix mbouj miz gihvei lumh Sawcuengh, liz Sawcuengh yied bae yied gyaenz lo.

Gou bingzciengz mbouj yungh Sawcuengh geijlai, hoeng gou bingzciengz caeuq bouxgeq ndaw mbanj gangjgoj lai gangj Vahcuengh. Youq henzndang gou, gyoengq nyez neix haujlai gaenq mbouj rox gangj

Vahcuengh lo. Gou ndaw hoz gag ngeix naeuz: It dwg guekgya raeuz youq daengx guek cienzmienh doigvangq Vahbujdungh, gyoengq nyez gaenq gvenq gangj Vahbujdungh lo, densi, soujgih boq maz dingz lai dwg gangj Vahbujdungh; ngeih dwg seizneix gyoengq daxboh daxmeh, haujlai hix mbouj rox gangj Vahcuengh geijlai, gyoengq lwnyez dai seiz iq couh mbouj miz vunz son gangj Vahcuengh. Gou youq hagdangz ndaw singz diucaz gvaq hagseng ndaw ban, ai q miz byongh lai hagseng mbouj rox gangj Vahcuengh, gou sawq yungh Vahcuengh cam gyoengqde geij coenz, haujlai mbouj rox gou gangj maz. Gyoengq hagseng ndaw singz neix, haujlai dai lajmbanj daeu hwnjdangz le couh menhmenh lumz gangj Vahcuengh lo!

Gou gag ngeix: Ai q miz ngoenz ndeu, gij Vahcuengh raeuz gangj daih dem daih, youq daihlaeng couh menhmenh mbouj gangj, doeklaeng couh deng saetcienz lo. Youq lajmbanj ndaejni daxbuz daxgoeng caeuq gyoengq lan gangj gij Vahgun saek ndip saek sug de, yaek riu daej mbouj ndaej. Raeuz dai seiz iq couh rox heuh di doenghgi doihduz lumjbaenz duzbit, duzgaeq, duzma, duzmeuz,

duzvaiz, duzcwz daengj, seizneix gangj ok ndaw bak gyoengq nyez daeu dwg yienghneix——Duzbit dwg "gaga", duzgaeq dwg "vovo", duzma dwg "vang'vang", duzmeuz dwg "meumeu" Gyoengq nyez mbouj rox aeu Vahcuengh bae heuh gij coh doihduz neix. Gyoengq nyez mbouj rox gizsaed doenghduz miz gij coh Vahcuengh, mboujdan miz gij coh Vahgun. Hoeng bouxlaux ndawranz naeuz gou: "Mwngz yienghneix siengj couh simyou lailai lo! Gyoengq nyez hag maz mbouj yungzheih, Vahcuengh ndaej loegyaem ce roengz-daeu, Sawcuengh youq ndaw saw, lij lau gyoengqde doeklaeng mbouj rox gangj Vahcuengh?"

Gangj ndaej deng, gou couh yawjraen gak cungj sinhvwnz dwen daengz Gvangjsih mizmbangj yienh mizmbangj cin, miz saek aen hagdangz hwnj dangz Sawcuengh. Seizneix ciengzseiz raen baez daengz ngoenz-ciet gizneix gizde baij daij doxdax eu fwen, miz haujlai daegmbauq dahsau camgya, lij miz di lwnyez vunz lij daemqdetdet, mbeihung hwnj daij caeuq bouxhung doxbeij, hai bak eu ndaej goksadsad, eu sat gyoengq-vunz lajdaiz bekwngz daddad, haen h mbouj dingz.

Vahcuengh dwg vahcoj Bouxcuengh raeuz, aeu lai gangj di Vahcuengh, seizneix gou hix menhmenh dauq yawj di faenzieng Sawcuengh lo, maqmuengh Vahcuengh Sawcuengh yied daeu yied hoenghhdwd!



Gocengz maj ndaej mwncupcup.

(Yungz Yen Yenveij Senhconzbu hawj)

Daengngoenz Baihdoeng Mbouj Rox Doek

——Cimh Riz Bak Bi Cungguk Gungcanjdangj

□ Cingh Swmungz / 清似蒙

Miz geijlai gunnanz,
Caez daeu ram daeu rap,
Ginh minz caez doxgap,
Ndae j ram rap gvaqbae.

Vangzdujlingj(黄土岭) hoenxeiengq,
Yizbwnj giengh mbouj baenz,
De mbat neix rox haemz,
De raen fangz oknyouh.

Lohgen youh loh din,
Bing lwmnz caen ak,
Raek cungq lij dawz gvak,

Hai fwz gag ndaem naz.

"Gauj dajndaem dajciengx,
Cauh daihliengh gaiqgwn,
Bouxbox gag doengh fwngz,
Ndae j miz gwn miz daenj".

Lai doengh uk cix gvai,
Lai doengh fwngz cix ak,
Nanznizvanh loegcak,
Mbwn lak goj miz gwn.

Lau faex dumz baenz nduk,

Lau gwnguk baenz gungz,
Yenzanh guh "cingfung"(整风),
Bauj saekhoengz mbouj bienq.

7. Dingj Yizbwnj Ndae j Hingz

Gwn leix miz vunz bang,
Guhvang ndi boux coengh,
Yizbwnj lengqlengq hoenx,
Famh daengxgyoengq dwgcaengz.

Simnduk-deng byaj bag,
Hengzyak baenz fangzbyaiz,
Duznou byaij hwnj gai,

Vunz lai ca bae moeb.

Yizbwnj Daibingzyangz,
Hangz Meijgoz mbouj gvaq,
Yenzswjdan bauqcaq,
Daihba j vunz deng dai.

Suhlenz haeu j doengbaek,
Sousaeb binggvandoeng,
Sik vaih geizdaengngoenz,
Vutvak roengz gwnz namh.